

I. DISPOSICIÓN XERAIS

XEFATURA DO ESTADO

12765 *Lei 34/2010, do 5 de agosto, de modificación das leis 30/2007, do 30 de outubro, de contratos do sector público; 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais; e 29/1998, do 13 de xullo, reguladora da xurisdición contencioso-administrativa, para adaptación á normativa comunitaria das dúas primeiras.*

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei.

PREÁMBULO

A Directiva 2007/66/CE, do 11 de decembro, modifica substancialmente as anteriores directivas comunitarias 89/665/CEE, do 21 de decembro, e 92/13/CEE, do 25 de febreiro, que regulaban os recursos en materia de contratación, tanto con referencia aos contratos do sector público como con respecto aos que celebren as entidades contratantes nos sectores da auga, a enerxía, os transportes e os servizos postais.

A finalidade da reforma non foi outra que reforzar os efectos do recurso permitindo que os candidatos e licitadores que interveñan nos procedementos de adxudicación poidan interpor recurso contra as infraccións legais que se produzan na tramitación dos procedementos de selección e contén coa posibilidade razoable de conseguir unha resolución eficaz.

Para iso, a Directiva establece unha serie de medidas accesorias para garantir os efectos da resolución que se dite no procedemento de impugnación. Unha de tales medidas é, precisamente, a suspensión do acordo de adxudicación ata que transcorra un prazo suficiente para que os interesados poidan interpor os seus recursos. Congruente con esta, prevese tamén que a suspensión dos acordos de adxudicación se mantéña ata que se resolva sobre o fondo do recurso ou, polo menos, sobre o mantemento ou non da suspensión.

Por outra banda, e con carácter xeral, prevese a facultade dos recorrentes de solicitar a adopción de calquera medida cautelar tendente a asegurar os efectos da resolución que se poida adoptar no procedemento de recurso ou a evitar os danos que poidan derivar do mantemento do acto impugnado.

Xunto a estas medidas, a Directiva prevé, para os casos en que a infracción afecte a publicidade da convocatoria do contrato ou a inobservancia dos prazos de suspensión previstos nela, a posibilidade de declarar a nulidade dos contratos así adxudicados.

En aplicación destes principios, á hora de incorporar o contido da Directiva ás leis 30/2007, do 30 de outubro, de contratos do sector público, e 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais, é fundamental establecer un procedemento de trámites áxiles en que a decisión resolutoria se poida adoptar no tempo máis breve posible sen deixar de atender a garantía dos dereitos dos interesados.

Ambas as leis conteñen xa normas reguladoras dos recursos ou reclamacións, segundo os casos, que se poden interpor contra os actos de adxudicación ou contra os actos do procedemento administrativo que lles serven de base. E mesmo ambas prevén o prazo de suspensión subseguente á adxudicación, a suspensión do acto como consecuencia da

interposición do recurso ou reclamación e a adopción de medidas cautelares. Quedan, con todo, por resolver algunhas cuestións tales como a relativa á competencia para a resolución do recurso que a nova Directiva exige que se lle atribúa a un órgano independente ou á suspensión da adxudicación que se debe manter ata que o dito órgano resolva sobre o mantemento ou non dela ou sobre o fondo.

Así mesmo, a incorporación das normas da Directiva exige unha precisa determinación de cal é o momento a partir do cal comeza o cómputo do prazo de espera e do prazo para a interposición do recurso, así como unha nova regulación do contido das notificacións que se deben facer aos licitadores para lles comunicar con suficiente detalle cal é o resultado da licitación e as razóns que levaron o órgano de contratación a adoptar unha decisión en tal sentido.

Do mesmo xeito, foi necesario dar solución á contradición aparente que podía supor para o carácter universal do recurso o feito de que os actos producidos entre a adxudicación provisoria e a definitiva quedasen fóra do ámbito de aplicación del, pois, aínda que se trata de actos de cumprimento practicamente mecánico en que a controversia xurídica é apenas imaxinable, conceptualmente deben ser susceptibles de recurso tamén para dar plena satisfacción á configuración que del fai a nova Directiva 2007/66/CE, do 11 de decembro. Esta circunstancia levou á necesidade de refundir nun só os actos de adxudicación provisoria e definitiva facendo coincidir a perfección do contrato coa formalización, sen que entre ambos os trámites se prevexa actuación ningunha, salvo, claro está, as que deriven da posible interposición do recurso. Esta modificación xerou a necesidade de modificar unha serie importante de artigos da lei que resultaron afectados por ela mesmo cando non teñan relación directa co recurso especial en materia de contratación.

Por outra banda, e posto que o Tribunal Constitucional expresamente admitiu que o Estado legisle con carácter supletorio sobre materias de competencia autonómica nos supostos en que se trate de incorporación ao dereito interno da normativa comunitaria, prevese na disposición transitoria segunda un réxime para as comunidades autónomas aplicable mentres non teñan creados os seus propios órganos encargados da resolución de recursos.

Isto, unido ao feito de que é preciso dar cabida en ambas as leis á declaración de nulidade dos contratos nos termos previstos na Directiva, aconsella facer unha reforma que non ten máis alcance que adaptar ambas as leis ás novas exixencias da Directiva 2007/66/CE, do 11 de decembro.

Artigo primeiro. *Modificación da Lei 30/2007, do 30 de outubro, de contratos do sector público.*

Modifícase a Lei 30/2007, do 30 de outubro, de contratos do sector público, nos termos que resultan dos puntos seguintes:

Un. No capítulo V do título I do libro primeiro da lei créase a sección primeira co rótulo «Réxime xeral», comprensiva dos artigos 31 a 36, ambos inclusive.

Dous. Suprímese o capítulo VI do título I do libro primeiro da lei e créase a sección segunda do capítulo V do título I do libro primeiro, co rótulo «Supostos especiais de nulidade», que comprende os seus artigos 37, 38 e 39, que quedan redactados da seguinte forma:

«Sección segunda. Supostos especiais de nulidade

Artigo 37. Supostos especiais de nulidade contractual.

1. Os contratos suxeitos a regulación harmonizada a que se refiren os artigos 13 a 17, ambos inclusive, desta lei, así como os contratos de servizos comprendidos nas categorías 17 a 27 do anexo II cuxo valor estimado sexa igual ou superior a 193.000 euros serán nulos nos seguintes casos:

a) Cando o contrato se adxudicase sen cumprir previamente co requisito de publicación do anuncio de licitación no «Diario Oficial de la Unión Europea», naqueles casos en que sexa preceptivo, de conformidade co artigo 126.

b) Cando non se respectase o prazo de quince días hábiles previsto no artigo 140.3 para a formalización do contrato sempre que concorran os dous seguintes requisitos:

1.º) Que por esta causa o licitador se vise privado da posibilidade de interpor o recurso regulado nos artigos 310 e seguintes e,

2.º) Que, ademais, concorra algunha infracción dos preceptos que regulan o procedemento de adxudicación dos contratos que lle impedisese obter esta.

c) Cando, malia terse interposto o recurso especial en materia de contratación a que se refiren os artigos 310 e seguintes, se leve a efecto a formalización do contrato sen ter en conta a suspensión automática do acto de adxudicación nos casos en que for procedente, e sen esperar a que o órgano independente ditase resolución sobre o mantemento ou non da suspensión do acto impugnado.

d) Tratándose dun contrato baseado nun acordo marco do artigo 180 celebrado con varios empresarios que, polo seu valor estimado, deba ser considerado suxeito a regulación harmonizada, se se incumpriron as normas sobre adxudicación establecidas no parágrafo segundo do artigo 182.4.

e) Cando se trate da adxudicación dun contrato específico baseado nun sistema dinámico de contratación en que estiveren admitidos varios empresarios, sempre que o contrato que se vai adxudicar estea suxeito a regulación harmonizada e se incumprisen as normas establecidas no artigo 186 sobre adxudicación de tales contratos.

2. Non obstante o disposto no número anterior, non procederá a declaración de nulidade a que se refire este artigo no suposto da letra a) do número anterior de concorreren conxuntamente as tres circunstancias seguintes:

a) Que, de conformidade co criterio do órgano de contratación, o contrato estea incluído nalgún dos supostos de exención de publicación do anuncio de licitación no «Diario Oficial de la Unión Europea» previstos nesta lei.

b) Que o órgano de contratación publique no «Diario Oficial de la Unión Europea» un anuncio de transparencia previa voluntaria en que se manifeste a súa intención de celebrar o contrato e que conteña os seguintes aspectos:

- identificación do órgano de contratación
- descrición da finalidade do contrato
- xustificación da decisión de adxudicar o contrato sen o requisito de publicación do artigo 126
- identificación do adxudicatario do contrato
- calquera outra información que o órgano de contratación considere relevante

c) Que o contrato non se perfeccionase ata transcorridos dez días hábiles contados desde o seguinte ao de publicación do anuncio.

3. Non procederá a declaración de nulidade a que se refire este artigo nos supostos das letras d) e e) de concorreren conxuntamente as dúas condicións seguintes:

a) Que o órgano de contratación lles notificase a todos os licitadores afectados a adxudicación do contrato e, se o solicitan, os motivos do rexeitamento da súa candidatura ou da súa proposición e das características da proposición do adxudicatario que foron determinantes da adxudicación ao seu favor, sen prexuízo do disposto no artigo 137 en canto aos datos cuxa comunicación non sexa procedente.

b) Que o contrato non se perfeccionase ata transcorridos quince días hábiles desde o seguinte ao da remisión da notificación aos licitadores afectados.

Artigo 38. *Consecuencias xurídicas da declaración de nulidade nos supostos do artigo anterior.*

1. A declaración de nulidade polas causas previstas no artigo anterior producirá os efectos establecidos no artigo 35.1 desta lei.

2. O órgano competente para declarar a nulidade, porén, poderá non declárala e acordar o mantemento dos efectos do contrato se, atendendo ás circunstancias excepcionais que concorran, considera que existen razóns imperiosas de interese xeral que o exixan.

Só se considerará que os intereses económicos constitúen as razóns imperiosas mencionadas no primeiro parágrafo deste número nos casos excepcionais en que a declaración de nulidade do contrato dea lugar a consecuencias desproporcionadas.

Así mesmo, non se considerará que constitúen razóns imperiosas de interese xeral os intereses económicos directamente vinculados ao contrato en cuestión, tales como os custos derivados do atraso na execución do contrato, da convocatoria dun novo procedemento de contratación, do cambio do operador económico que deberá executar o contrato ou das obrigas xurídicas derivadas da nulidade.

A resolución pola cal se acorde o mantemento dos efectos do contrato deberá ser obxecto de publicación no perfil de contratante previsto no artigo 42 desta lei.

3. No caso previsto no número anterior, a declaración de nulidade deberase substituír por algunha das sancións alternativas seguintes:

a) A imposición de multas ao poder adxudicador por un importe que non poderá ser inferior ao 5 por cento nin superar o 20 por cento do prezo de adxudicación do contrato. Cando se trate de poderes adxudicadores cuxa contratación se efectúe a través de diferentes órganos de contratación, a sanción alternativa recaerá sobre o orzamento do departamento, consellería ou órgano correspondente que adxudicase o contrato.

Para determinar a contía na imposición das multas, o órgano competente tomará en consideración a reiteración, a porcentaxe do contrato que fose executado ou o dano causado aos intereses públicos ou, de ser o caso, ao licitador, de tal forma que estas sexan eficaces, proporcionadas e disuasorias.

b) A redución proporcionada da duración do contrato. Neste caso, o órgano competente tomará en consideración a reiteración, a porcentaxe do contrato que fose executado ou o dano causado aos intereses públicos ou, de ser o caso, ao licitador. Así mesmo, determinará a indemnización que lle corresponda ao contratista polo lucro cesante derivado da redución temporal do contrato, sempre que a infracción que motive a sanción alternativa non lle sexa imputable.

4. O disposto en todos os números anteriores entenderase sen prexuízo das sancións de carácter disciplinario que corresponda impor ao responsable das infraccións legais.

Artigo 39. *Interposición da cuestión de nulidade.*

1. A cuestión de nulidade, nos casos a que se refire o artigo 37.1, deberá promoverse ante o órgano previsto no artigo 311, que será o competente para tramitar o procedemento e resolvela.

2. Poderá promover a cuestión de nulidade, en tales casos, toda persoa física ou xurídica cuxos dereitos ou intereses lexítimos se visen prexudicados ou poidan resultar afectados polos supostos de nulidade do artigo 37. O órgano competente, no entanto, poderá non admitila cando o interesado tivese interposto recurso especial regulado nos artigos 310 e seguintes sobre o mesmo acto tendo respectado o órgano de contratación a suspensión do acto impugnado e a resolución ditada.

3. O prazo para a interposición da cuestión de nulidade será de trinta días hábiles contados:

a) desde a publicación da adxudicación do contrato na forma prevista no artigo 138.2, incluíndo as razóns xustificativas da non publicación da licitación no «Diario Oficial de la Unión Europea»,

b) ou desde a notificación, aos licitadores afectados, dos motivos do rexeitamento da súa candidatura ou da súa proposición e das características da proposición do adxudicatario que foron determinantes da adxudicación ao seu favor, sen prexuízo do disposto no artigo 137 en canto aos datos cuxa comunicación non sexa procedente.

4. Fóra dos casos previstos no número anterior, a cuestión de nulidade deberase interpor antes de que transcorran seis meses contados desde a formalización do contrato.

5. A cuestión de nulidade tramitarase de conformidade co disposto nos artigos 314 e seguintes coas seguintes excepcións:

a) Non será de aplicación o disposto no artigo 314.1 en canto á existencia de anunciar a interposición do recurso.

b) A interposición da cuestión de nulidade non producirá efectos suspensivos de ningunha clase por si soa.

c) O prazo establecido no artigo 313.2, parágrafo segundo, e no 316.3 para que o órgano de contratación formule alegacións en relación coa solicitude de medidas cautelares elevarase a sete días hábiles.

d) O prazo establecido no artigo 316.2 para a remisión do expediente polo órgano de contratación, acompañado do correspondente informe, elevarase a sete días hábiles.

e) Na resolución da cuestión de nulidade, o órgano competente para ditala deberá resolver tamén sobre a procedencia de aplicar as sancións alternativas se o órgano de contratación o solicitou no informe que debe acompañar a remisión do expediente administrativo.

f) De o órgano de contratación non o ter solicitado na forma establecida na letra anterior poderá facelo no trámite de execución da resolución. En tal caso o órgano competente, logo de audiencia por un prazo de cinco días ás partes que comparecesen no procedemento, resolverá sobre a procedencia ou non de aplicar a sanción alternativa solicitada dentro dos cinco días seguintes ao do transcurso do prazo anterior. Contra esta resolución caberá interpor recurso nos mesmos termos previstos para as resolucións ditas resolvendo sobre o fondo.»

Tres. Engádesse un libro VI, que contén os artigos 310 a 320, ambos inclusive, coa redacción que consta a continuación:

«LIBRO VI

Réxime especial de revisión de decisións en materia de contratación e medios alternativos de resolución de conflitos

Artigo 310. *Recurso especial en materia de contratación: actos impugnables.*

1. Serán susceptibles de recurso especial en materia de contratación previo á interposición do contencioso-administrativo os actos relacionados no número 2 deste mesmo artigo, cando se refiran aos seguintes tipos de contratos que pretendan concertar as administracións públicas e as entidades que teñan a condición de poderes adxudicadores:

a) Contratos de obras, concesión de obras públicas, de subministración, de servizos, de colaboración entre o sector público e o sector privado e acordos marco, suxeitos a regulación harmonizada.

b) Contratos de servizos comprendidos nas categorías 17 a 27 do anexo II desta lei cuxo valor estimado sexa igual ou superior a 193.000 euros e

c) Contratos de xestión de servizos públicos en que o orzamento de gastos de primeiro establecemento, excluído o importe do imposto sobre o valor engadido, sexa superior a 500.000 euros e o prazo de duración superior a cinco anos.

Serán tamén susceptibles deste recurso os contratos subvencionados a que se refire o artigo 17.

2. Poderán ser obxecto do recurso os seguintes actos:

a) Os anuncios de licitación, os pregos e os documentos contractuais que establezan as condicións que deban rexer a contratación,

b) Os actos de trámite adoptados no procedemento de adxudicación, sempre que estes decidan directa ou indirectamente sobre a adxudicación, determinen a imposibilidade de continuar o procedemento ou produzan indefensión ou prexuízo irreparable a dereitos ou intereses lexítimos. Consideraranse actos de trámite que determinan a imposibilidade de continuar o procedemento os actos da mesa de contratación polos cales se acorde a exclusión de licitadores.

c) Os acordos de adxudicación adoptados polos poderes adxudicadores.

3. Os defectos de tramitación que afecten actos distintos dos recollidos no número 2 poderán ser postos de manifesto polos interesados ao órgano a que corresponda a instrución do expediente ou ao órgano de contratación, para efectos da súa corrección, e sen prexuízo de que as irregularidades que os afecten poidan ser alegadas polos interesados ao impugnar o acto de adxudicación.

4. Non se dará este recurso en relación cos procedementos de adxudicación que se sigan polo trámite de emerxencia regulado no artigo 97 desta lei.

5. Non procederá a interposición de recursos administrativos ordinarios contra os actos enumerados neste artigo, salvo a excepción prevista no seguinte con respecto ás comunidades autónomas.

Os actos que se diten nos procedementos de adxudicación de contratos administrativos que non reúnan os requisitos do número 1 poderán ser obxecto de recurso de conformidade co disposto na Lei 30/1992, do 26 de novembro, de réxime xurídico das administracións públicas e do procedemento administrativo común, e na Lei 29/1998, do 13 de xullo, reguladora da xurisdición contencioso-administrativa.

6. O recurso especial regulado neste artigo e os seguintes terá carácter potestativo.

Artigo 311. Órgano competente para a resolución do recurso.

1. No ámbito da Administración xeral do Estado, o coñecemento e resolución dos recursos a que se refire o artigo anterior estará encomendado a un órgano especializado que actuará con plena independencia funcional no exercicio das súas competencias. Este tribunal coñecerá tamén dos recursos especiais que se susciten de conformidade co artigo anterior contra os actos dos órganos competentes do Consello Xeral do Poder Xudicial, do Tribunal Constitucional e do Tribunal de Contas.

Para estes efectos créase o Tribunal Administrativo Central de Recursos Contractuais, que estará adscrito ao Ministerio de Economía e Facenda e composto por un presidente e un mínimo de dous vogais. Regulamentariamente poderase incrementar o número de vogais que deban integrar o tribunal cando o volume de asuntos sometidos ao seu coñecemento o aconselle.

Poderán ser designados vogais deste tribunal os funcionarios de carreira de corpos e escalas aos cales se acceda con título de licenciado ou de grao e que desempeñasen a súa actividade profesional por tempo superior a quince anos,

preferentemente no ámbito do dereito administrativo relacionado directamente coa contratación pública.

O presidente do tribunal deberá ser funcionario de carreira, de corpo ou escala para cuxo acceso sexa requisito necesario o título de licenciado ou grao en dereito e ter desempeñado a súa actividade profesional por tempo superior a quince anos, preferentemente no ámbito do dereito administrativo relacionado directamente coa contratación pública.

No caso de que os vogais ou o presidente foren designados entre funcionarios de carreira incluídos no ámbito de aplicación da Lei 7/2007, do 12 de abril, do Estatuto básico do emprego público, estes deberán pertencer a corpos ou escalas clasificados no subgrupo A1 do artigo 76 da dita lei.

A designación do presidente e dos vogais deste tribunal será realizada polo Consello de Ministros por proposta conxunta dos ministros de Economía e Facenda e de Xustiza.

Os designados terán carácter independente e inamovible, e non poderán ser removidos dos seus postos senón polas causas seguintes:

- a) Por expiración do seu mandato.
- b) Por renuncia aceptada polo Goberno.
- c) Por perda da nacionalidade española.
- d) Por incumprimento grave das súas obrigas.
- e) Por condena a pena privativa de liberdade ou de inhabilitación absoluta ou especial para emprego ou cargo público por razón de delito.
- f) Por incapacidade sobrevida para o exercicio da súa función.

A remoción polas causas previstas nas letras c), d), e) e f) será acordada polo Goberno logo de expediente.

A duración do nomeamento efectuado de conformidade con este número será de seis anos e non se poderá prorrogar. Non obstante, a primeira renovación do Tribunal farase de forma parcial ao tres anos do nomeamento. A este respecto, antes de se cumprir o prazo indicado determinaranse, mediante sorteo, os vogais que deban cesar.

En calquera caso, cesado un vogal, este continuará no exercicio das súas funcións ata que tome posesión do seu cargo o que o deba substituír.

Serán de aplicación ao réxime de constitución e funcionamento do Tribunal as disposicións da Lei 30/1992, do 26 de novembro, de réxime xurídico das administracións públicas e do procedemento administrativo común.

2. No ámbito das comunidades autónomas, así como no dos órganos competentes das súas asembleas lexislativas e das institucións autonómicas análogas ao Tribunal de Contas e ao Defensor do Pobo, a competencia para resolver os recursos será establecida polas súas normas respectivas, que deberán crear un órgano independente cuxo titular, ou no caso de que for colexiado polo menos o seu presidente, teña cualificacións xurídicas e profesionais que garantan un adecuado coñecemento das materias de que deba coñecer. O nomeamento dos membros desta instancia independente e a terminación do seu mandato estarán suxeitos, no relativo á autoridade responsable do seu nomeamento, á duración do seu mandato e á súa revogabilidade, a condicións que garantan a súa independencia e inamovibilidade.

As comunidades autónomas poderán prever a interposición de recurso administrativo previo ao recollido no artigo 310.

Neste último caso, a execución dos actos de adxudicación impugnados quedará suspendida ata que o órgano competente para resolvelo decida sobre o fondo da cuestión promovida. En todo caso, se a resolución non for totalmente estimatoria, a suspensión persistirá nos termos previstos no artigo 315.

Poderán, as comunidades autónomas, así mesmo, atribuír a competencia para a resolución dos recursos ao tribunal especial creado no número 1 deste artigo. Para ese efecto, deberán celebrar o correspondente convenio coa Administración

xeral do Estado, no cal se estipulen as condicións en que a comunidade sufragará os gastos derivados desta asunción de competencias.

As cidades autónomas de Ceuta e Melilla poderán designar os seus propios órganos independentes axustándose aos requisitos establecidos neste número para os órganos das comunidades autónomas, ou ben atribuír a competencia ao Tribunal Administrativo Central de Recursos Contractuais subscribindo para o efecto un convenio nos termos previstos no parágrafo anterior.

3. No ámbito das corporacións locais, a competencia para resolver os recursos será establecida polas normas das comunidades autónomas cando estas teñan atribuída competencia normativa e de execución en materia de réxime local e contratación.

No caso de que non exista previsión expresa na lexislación autonómica, a competencia corresponderá ao mesmo órgano a que as comunidades autónomas en cuxo territorio se integran as corporacións locais atribúsen a competencia para resolver os recursos do seu ámbito.

4. Cando se trate dos recursos interpostos contra actos dos poderes adjudicadores que non teñan a consideración de administracións públicas, a competencia estará atribuída ao órgano independente que a teña respecto da Administración a que estea vinculada a entidade autora do acto impugnado.

Se a entidade contratante estiver vinculada con máis dunha Administración, o órgano competente para resolver o recurso será aquel que teña atribuída a competencia respecto da que teña o control ou participación maioritaria e, no caso de que todas ou varias delas teñan unha participación igual, ante o órgano que elixa o recorrente de entre os que resulten competentes conforme as normas deste número.

5. Nos contratos subvencionados a que se refire o último inciso do artigo 310.1 desta lei, a competencia corresponderá ao órgano independente que exerza as súas funcións respecto da Administración a que estea adscrito o ente ou organismo que outorgase a subvención, ou ao que estea adscrita a entidade que a concedeu, cando esta non teña o carácter de Administración pública. No suposto de concorrencia de subvencións por parte de distintos suxeitos do sector público, a competencia determinarase atendendo á subvención de maior contía e, en caso de igualdade de importe, ao órgano ante o cal o recorrente decida interpor o recurso de entre os que resulten competentes conforme as normas deste número.

Artigo 312. *Lexitimación.*

Poderá interpor o correspondente recurso especial en materia de contratación toda persoa física ou xurídica cuxos dereitos ou intereses lexítimos se visen prexudicados ou poidan resultar afectados polas decisións obxecto de recurso.

Artigo 313. *Solicitud de medidas provisionais.*

1. Antes de interpor o recurso especial regulado neste libro, as persoas físicas e xurídicas, lexitimadas para iso conforme o disposto no artigo anterior, poderán solicitar ante o órgano competente para resolver o recurso a adopción de medidas provisionais. Tales medidas irán dirixidas a corrixir infraccións de procedemento ou impedir que se causen outros prexuízos aos intereses afectados, e poderán estar incluídas, entre elas, as destinadas a suspender ou a facer que se suspenda o procedemento de adjudicación do contrato en cuestión ou a execución de calquera decisión adoptada polos órganos de contratación.

2. O órgano competente para resolver o recurso deberá adoptar decisión en forma motivada sobre as medidas provisionais dentro do cinco días hábiles seguintes ao da presentación do escrito en que se soliciten.

Para estes efectos, o órgano decisorio, no mesmo día en que se reciba a petición da medida provisoria, comunicará esta ao órgano de contratación, que disporá dun prazo de dous días hábiles para presentar as alegacións que considere oportunas

referidas á adopción das medidas solicitadas ou ás propostas polo propio órgano decisorio. Se, transcorrido este prazo, non se tiver formulado alegacións continuarase o procedemento.

Se antes de ditarse resolución se tivese interposto o recurso, o órgano decisorio acumulará a este a solicitude de medidas provisorias e resolverá sobre elas na forma prevista no artigo 316.

Contra as resolucións ditadas neste procedemento non caberá ningún recurso, sen prexuízo dos que procedan contra as resolucións que se diten no procedemento principal.

3. Cando da adopción das medidas provisorias poidan derivar prexuízos de calquera natureza, a resolución poderá impor a constitución de caución ou garantía suficiente para responder deles, sen que aquelas produzan efectos ata que a dita caución ou garantía sexa constituída.

Regulamentariamente determinaranse a contía e forma da garantía que se vaia constituír así como os requisitos para a súa devolución.

4. A suspensión do procedemento que se poida acordar cautelarmente non afectará, en ningún caso, o prazo concedido para a presentación de ofertas ou proposicións polos interesados.

5. As medidas provisorias que se soliciten e acorden con anterioridade á presentación do recurso especial en materia de contratación decaerán unha vez que transcorra o prazo establecido para a súa interposición sen que o interesado o deducise.

Artigo 314. *Iniciación do procedemento e prazo de interposición.*

1. Todo aquel que se propoña interpor recurso contra algún dos actos indicados no artigo 310.1 e 2 deberao anunciar previamente mediante escrito en que especifique o acto do procedemento que vaia ser obxecto del, presentado ante o órgano de contratación no prazo previsto no número seguinte para a interposición do recurso.

2. O procedemento de recurso iniciárase mediante escrito que se deberá presentar no prazo de quince días hábiles contados a partir do seguinte a aquel en que se remita a notificación do acto impugnado de conformidade co disposto no artigo 135.4.

Non obstante o disposto no parágrafo anterior:

a) Cando o recurso se interpoña contra o contido dos pregos e demais documentos contractuais, o cómputo iniciárase a partir do día seguinte a aquel en que estes fosen recibidos ou postos á disposición dos licitadores ou candidatos para o seu coñecemento conforme se dispón no artigo 142 desta lei.

b) Cando se interpoña contra actos de trámite adoptados no procedemento de adjudicación ou contra un acto resultante da aplicación do procedemento negociado sen publicidade, o cómputo iniciárase a partir do día seguinte a aquel en que se tivese coñecemento da posible infracción.

c) Cando se interpoña contra o anuncio de licitación, o prazo comezará a contarse a partir do día seguinte ao de publicación.

3. A presentación do escrito de interposición deberase facer necesariamente no rexistro do órgano de contratación ou no do órgano competente para a resolución do recurso.

4. No escrito de interposición farase constar o acto impugnado, o motivo que fundamente o recurso, os medios de proba de que pretenda valerese o recorrente e, de ser o caso, as medidas da mesma natureza que as mencionadas no artigo anterior cuxa adopción solicite.

A este escrito xuntarase:

a) O documento que acredite a representación do comparecente, salvo se figura unido ás actuacións doutro recurso pendente ante o mesmo órgano; nese caso poderase solicitar que se expida certificación para a súa unión ao procedemento.

- b) O documento ou documentos que acrediten a lexitimación do demandante cando a teña por lla ter transmitido outro por herdanza ou por calquera outro título.
- c) A copia ou o traslado do acto expreso contra o cal se recorra, ou indicación do expediente en que recaese ou do xornal oficial ou perfil de contratante en que se publicase.
- d) O documento ou documentos en que funde o seu dereito.
- e) O xustificante de ter dado cumprimento ao establecido no número 1 deste artigo. Sen este xustificante non se dará curso ao escrito de interposición, aínda que a súa omisión se poderá emendar de conformidade co establecido no número seguinte.

5. Para a emenda dos defectos que poidan afectar o escrito de recurso, requirirase o interesado co fin de que, nun prazo tres días hábiles, emende a falta ou presente os documentos preceptivos, con indicación de que, se así non o fixer, se terá por desistido da súa petición, e quedará suspendida a tramitación do expediente cos efectos previstos no número 5 do artigo 42 da Lei 30/1992, do 26 de novembro, de réxime xurídico das administracións públicas e do procedemento administrativo común.

Artigo 315. *Efectos derivados da interposición do recurso.*

Unha vez interposto o recurso, se o acto impugnado é o de adxudicación, quedará en suspenso a tramitación do expediente de contratación.

Artigo 316. *Tramitación do procedemento.*

1. O procedemento para tramitar os recursos especiais en materia de contratación rexerese polas disposicións da Lei 30/1992, do 26 de novembro, coas especialidades que se recollen nos números seguintes.

2. Interposto o recurso, o órgano encargado de resolvelo notificarallo no mesmo día ao órgano de contratación con remisión da copia do escrito de interposición e reclamará o expediente de contratación á entidade, órgano ou servizo que o tramitou, que deberá remitilo dentro dos dous días hábiles seguintes acompañado do correspondente informe.

Se o recurso se interpuxo ante o órgano de contratación autor do acto impugnado, este deberallo remitir ao órgano encargado de resolvelo dentro dos dous días hábiles seguintes ao da súa recepción acompañado do expediente administrativo e do informe a que se refire o parágrafo anterior.

3. Dentro do cinco días hábiles seguintes ao da interposición do recurso, dará traslado deste aos restantes interesados, e concederalles un prazo de cinco días hábiles para formularen alegacións e, de forma simultánea a este trámite, decidirá, no prazo de cinco días hábiles, acerca das medidas cautelares de se ter solicitado a adopción dalgunha no escrito de interposición do recurso ou se ter procedido á acumulación prevista no parágrafo terceiro do artigo 313.2. Á adopción destas medidas será de aplicación, en todo caso, o disposto no artigo 313 en canto á audiencia do órgano de contratación. Serán igualmente aplicables os números 3 e 4 do citado artigo.

Así mesmo, neste prazo resolverá, de ser o caso, sobre se procede ou non o mantemento da suspensión automática prevista no artigo anterior, que se entenderá vixente mentres non se dite resolución expresa en que se acorde o levantamento. De as medidas provisionais se teren solicitado despois da interposición do recurso, o órgano competente resolverá sobre elas nos termos previstos no parágrafo anterior sen suspender o procedemento principal.

4. Os feitos relevantes para a decisión do recurso poderanse acreditar por calquera medio de proba admisible en dereito. Cando os interesados o soliciten ou o órgano encargado da resolución do recurso non teña por certos os feitos alegados polos interesados ou a natureza do procedemento o exixa, poderase acordar a

apertura do período de proba por un prazo de dez días hábiles, co fin de que se poidan practicar cantas xulgue pertinentes.

O órgano competente para a resolución do recurso poderá rexeitar as probas propostas polos interesados cando sexan manifestamente improcedentes ou innecesarias, mediante resolución motivada.

A práctica das probas anunciaráselles con antelación suficiente aos interesados.

5. O órgano competente para a resolución do recurso deberá, en todo caso, garantir a confidencialidade e o dereito á protección dos segredos comerciais en relación coa información contida no expediente de contratación, sen prexuízo de que poida coñecer e tomar en consideración a dita información á hora de resolver. Corresponderá ao dito órgano resolver acerca de como garantir a confidencialidade e o segredo da información que conste no expediente de contratación, sen que por iso resulten prexudicados os dereitos dos demais interesados á protección xurídica efectiva e ao dereito de defensa no procedemento.

Artigo 317. *Resolución.*

1. Unha vez recibidas as alegacións dos interesados, ou transcorrido o prazo sinalado para a súa formulación, e o da proba, de ser o caso, o órgano competente deberá resolver o recurso dentro dos cinco días hábiles seguintes, e a continuación notificaráselles a resolución a todos os interesados.

2. A resolución do recurso estimará en todo ou en parte ou desestimarás as pretensións formuladas ou declarará a súa non admisión, e decidirá motivadamente cantas cuestións se formulasen. En todo caso, a resolución será congruente coa petición e, de ser procedente, pronunciarase sobre a anulación das decisións ilegais adoptadas durante o procedemento de adxudicación, incluíndo a supresión das características técnicas, económicas ou financeiras discriminatorias contidas no anuncio de licitación, anuncio indicativo, pregos, condicións reguladoras do contrato ou calquera outro documento relacionado coa licitación ou adxudicación, así como, se procede, sobre a retroacción de actuacións.

Se, como consecuencia do contido da resolución, for preciso que o órgano de contratación acordar a adxudicación do contrato a outro licitador, concederáselle a este un prazo de dez días hábiles para que cumpra o previsto no número 2 do artigo 135.

3. Así mesmo, por solicitude do interesado e se procede, poderáselle impor á entidade contratante a obriga de indemnizar a persoa interesada polos danos e perdas que lle puidese ocasionar a infracción legal que deu lugar ao recurso.

4. A resolución deberá acordar, tamén, o levantamento da suspensión do acto de adxudicación se no momento de a ditar continúa suspendido, así como das restantes medidas cautelares que se acordasen e a devolución das garantías cuxa constitución se exixise para a súa efectividade, se proceder.

5. No caso de que o órgano competente aprecie temeridade ou mala fe na interposición do recurso ou na solicitude de medidas cautelares, poderá acordar a imposición dunha multa ao responsable dela. O importe desta será de entre 1.000 e 15.000 euros e a súa contía determinarase en función da mala fe apreciada e do prexuízo ocasionado ao órgano de contratación e aos restantes licitadores. As contías indicadas neste número serán actualizadas cada dous anos mediante orde ministerial, por aplicación do índice de prezos de consumo calculado polo Instituto Nacional de Estatística.

Artigo 318. *Determinación da indemnización.*

1. Cando proceda a indemnización mencionada no número 3 do artigo anterior, esta fixarase atendendo no posible aos criterios dos números 2 e 3 do artigo 141 da Lei 30/1992, do 26 de novembro.

2. A indemnización deberá resarcir o reclamante, cando menos, dos gastos ocasionados pola preparación da oferta ou a participación no procedemento de contratación.

Artigo 319. *Efectos da resolución.*

1. Contra a resolución ditada neste procedemento só caberá a interposición de recurso contencioso-administrativo conforme o disposto no artigo 10, letras k) e l), do número 1 e no artigo 11, letra f), do seu número 1 da Lei 29/1998, do 13 de xullo, reguladora da xurisdición contencioso-administrativa.

Non procederá a revisión de oficio regulada no artigo 34 desta lei e no capítulo I do título VII da Lei 30/1992, do 26 de novembro, da resolución nin de ningún dos actos ditados polos órganos regulados no artigo 311. Tampouco estarán suxeitos a fiscalización polos órganos de control financeiro das administracións a que cada un deles estea adscrito.

2. Sen prexuízo do disposto no número anterior, a resolución será directamente executiva e resultará de aplicación, de ser o caso, o disposto no artigo 97 da Lei 30/1992, do 26 de novembro.

Artigo 320. *Arbitraje.*

Os entes, organismos e entidades do sector público que non teñan o carácter de administracións públicas poderán remitir a unha arbitraje, conforme as disposicións da Lei 60/2003, do 23 de decembro, de arbitraje, a solución das diferenzas que poidan xurdir sobre os efectos, cumprimento e extinción dos contratos que celebren».

Catro. Modifícase o artigo 17.2, que queda redactado da seguinte forma:

Artigo 17.2.

«2. As normas previstas para os contratos subvencionados aplicaranse a aqueles celebrados por particulares ou por entidades do sector público que non teñan a consideración de poderes adxudicadores, en conxunción, neste último caso, coas restantes disposicións desta lei que lles sexan de aplicación. Cando o contrato subvencionado sexa adxudicado por entidades do sector público que teñan a consideración de poder adxudicador, aplicaranse as normas de contratación previstas para estas entidades, de acordo coa súa natureza, salvo a relativa á determinación da competencia para resolver o recurso especial en materia de contratación e para adoptar medidas cautelares no procedemento de adxudicación, que se rexerá, en todo caso, pola regra establecida no artigo 311.»

Cinco. Modifícase o número 1 do artigo 21, ao cal se lle dá a seguinte redacción:

Artigo 21.1.

«1. A orde xurisdiccional contencioso-administrativa será a competente para resolver as cuestións litixiosas relativas á preparación, adxudicación, efectos, cumprimento e extinción dos contratos administrativos. Igualmente corresponderá a esta orde xurisdiccional o coñecemento das cuestións que se susciten en relación coa preparación e adxudicación dos contratos privados das administracións públicas e dos contratos suxeitos a regulación harmonizada, incluídos os contratos subvencionados a que se refire o artigo 17, así como dos contratos de servizos das categorías 17 a 27 do anexo II, cuxo valor estimado sexa igual ou superior a 193.000 euros, que pretendan concertar entes, organismos ou entidades que, sen seren administracións públicas, teñan a condición de poderes adxudicadores. Tamén coñecerá dos recursos interpostos contra as resolucións ditadas polos órganos de resolución de recursos previstos no artigo 311 desta lei.»

Seis. Modifícase o artigo 27.1, que queda redactado da seguinte forma:

«Artigo 27. *Perfección dos contratos.*

1. Os contratos que celebren os poderes adjudicadores perfecciónanse coa súa formalización. Os contratos subvencionados que, de conformidade co disposto no artigo 17 desta lei, deban considerarse suxeitos a regulación harmonizada, perfeccionaranse de conformidade coa lexislación pola cal se rexan. As partes deberán notificar a súa formalización ao órgano que outorgou a subvención.»

Sete. Engádesse ao artigo 28 o número 3, coa seguinte redacción:

«Artigo 28. *Carácter formal da contratación do sector público.*

...

3. Os contratos que celebren outros entes, organismos e entidades do sector público, cando sexan susceptibles de recurso especial en materia de contratación conforme o artigo 310.1, deberán formalizarse nos prazos establecidos no artigo 140.3.»

Oito. O artigo 31 queda redactado da seguinte forma:

«Artigo 31. *Supostos de invalidez.*

Ademais dos casos en que a invalidez derive da ilegalidade do seu clausulado, os contratos das administracións públicas e os contratos suxeitos a regulación harmonizada, incluídos os contratos subvencionados a que se refire o artigo 17, serán inválidos cando o sexa algún dos seus actos preparatorios ou o de adjudicación, por concorrer neles algunha das causas de dereito administrativo ou de dereito civil a que se refiren os artigos seguintes.»

Nove. Dáselle unha nova redacción ao artigo 34.1:

«Artigo 34. *Revisión de oficio.*

1. A revisión de oficio dos actos preparatorios e dos actos de adjudicación dos contratos das administracións públicas e dos contratos suxeitos a regulación harmonizada efectuarase de conformidade co establecido no capítulo primeiro do título VII da Lei 30/1992, do 26 de novembro.»

Dez. O número 1 do artigo 35 queda redactado da seguinte forma:

«Artigo 35. *Efectos da declaración de nulidade.*

1. A declaración de nulidade dos actos preparatorios do contrato ou da adjudicación, cando sexa firme, comportará, en todo caso, a do mesmo contrato, que entrará en fase de liquidación; as partes deberán restituír reciprocamente as cousas que recibisen en virtude del e, se isto non for posible, devolverase o seu valor. A parte que resulte culpable deberá indemnizar a contraria polos danos e perdas que sufrise.»

Once. O número 2 do artigo 42 redáctase da seguinte forma:

«Artigo 42. *Perfil de contratante.*

...

2. O perfil de contratante poderá incluír todo tipo de datos e informacións referentes á actividade contractual do órgano de contratación, tales como os anuncios de información previa recollidos no artigo 125, as licitacións abertas ou en curso e a documentación relativa a elas, as contratacións programadas, os contratos adjudicados, os procedementos anulados, e calquera outra información útil de tipo xeral, como puntos de contacto e medios de comunicación que se poden utilizar

para relacionarse co órgano de contratación. En todo caso, deberase publicar no perfil de contratante a adxudicación dos contratos».

Doce. Dáselle unha nova redacción á letra d) do número 2 do artigo 49:

«Artigo 49. *Prohibicións de contratar.*

...
2.
...

d) Ter retirado indebidamente a súa proposición ou candidatura nun procedemento de adxudicación, ou ter imposibilitado a adxudicación do contrato ao seu favor por non cumprir o establecido no artigo 135.2 dentro do prazo sinalado mediando dolo, culpa ou negligencia.»

Trece. Dáselle unha nova redacción á letra e) do número 2 do artigo 50:

«Artigo 50. Declaración da concorrencia de prohibicións de contratar e efectos.

...
2.
...

e) Nos casos previstos na letra d) do número 2 do artigo anterior, desde a data en que se procedese á adxudicación do contrato, se a causa é a retirada indebida de proposicións ou candidaturas; ou desde a data en que se debería ter procedido á adxudicación, se a prohibición se fundamenta no incumprimento do establecido no artigo 135.2.»

Catorce. O número 1, parágrafo primeiro, do artigo 83 queda redactado da seguinte forma:

«Artigo 83. *Exixencia de garantía.*

1. Os que presenten as ofertas economicamente máis vantaxosas nas licitacións dos contratos que celebren as administracións públicas deberán constituír, á disposición do órgano de contratación, unha garantía dun 5 por cento do importe de adxudicación, excluído o imposto sobre o valor engadido. No caso dos contratos con prezos provisorios a que se refire o artigo 75.5, a porcentaxe calcularase con referencia ao prezo máximo fixado.»

Quince. Dáselle unha nova redacción ao artigo 87.1:

«Artigo 87. *Constitución, reposición e reaxuste de garantías.*

1. O licitador que presentase a oferta economicamente máis vantaxosa deberá acreditar, no prazo sinalado no artigo 135.2, a constitución da garantía. De non cumprir este requisito por causas imputables a el, a Administración non efectuará a adxudicación ao seu favor, sendo de aplicación o disposto no último parágrafo do artigo 135.2.»

Dezaseis. Redáctanse na forma que segue os números 1 e 4 do artigo 91:

«Artigo 91. *Exixencia e réxime.*

1. En atención ás circunstancias concorrentes en cada contrato, os órganos de contratación poderanlles exixir aos licitadores a constitución dunha garantía que responda do mantemento das súas ofertas ata a súa adxudicación. Para o licitador que resulte adxudicatario, a garantía provisoria responderá tamén do cumprimento das obrigas que lle impón o segundo parágrafo do artigo 135.2.

Cando o órgano de contratación decida exixir unha garantía provisoria, deberá xustificar suficientemente no expediente as razóns polas cales considera procedente a súa exixencia para ese contrato en concreto.

...

4. A garantía provisoria extinguirase automaticamente e será devolta aos licitadores inmediatamente despois da adxudicación do contrato. En todo caso, a garantía será retida ao licitador cuxa proposición fose seleccionada para a adxudicación ata que proceda á constitución da garantía definitiva, e incautada ás empresas que retiren inxustificadamente a súa proposición antes da adxudicación.»

Dezasete. A redacción do artigo 92.1 queda da seguinte forma:

«Artigo 92. *Supostos e réxime.*

1. Nos contratos que celebren os entes, organismos e entidades do sector público que non teñan a consideración de administracións públicas, os órganos de contratación poderanlles exixir a prestación dunha garantía aos licitadores ou candidatos, para responder do mantemento das súas ofertas ata a adxudicación e, de ser o caso, formalización do contrato, ou ao adxudicatario, para asegurar a correcta execución da prestación.»

Dezaioito. Dáselles nova redacción ás letras b) e d) e suprímese a letra c) do número 2 do artigo 96; o d) pasa a ser o c), coa redacción que segue:

«Artigo 96. *Tramitación urxente do expediente.*

2.

...

b) Acordada a apertura do procedemento de adxudicación, os prazos establecidos nesta lei para a licitación, adxudicación e formalización do contrato reduciranse á metade, salvo o prazo de quince días hábiles establecido no parágrafo primeiro do artigo 140.3 como período de espera antes da formalización do contrato.

No entanto, cando se trate de procedementos relativos a contratos suxeitos a regulación harmonizada, esta redución non afectará os prazos establecidos nos artigos 142 e 143 para a facilitación de información aos licitadores e a presentación de proposicións no procedemento aberto. Nos procedementos restrinxidos e nos negociados en que, conforme o previsto no artigo 161.1, proceda a publicación dun anuncio da licitación, o prazo para a presentación de solicitudes de participación poderase reducir ata quince días contados desde o envío do anuncio de licitación, ou ata dez, se este envío se efectúa por medios electrónicos, informáticos ou telemáticos, e o prazo para facilitar a información suplementaria a que se refire o artigo 150.4 reducirase a catro días. No procedemento restrinxido, o prazo para a presentación de proposicións previsto no artigo 151.1 poderase reducir ata dez días a partir da data do envío da invitación para presentar ofertas.

c) O prazo de inicio da execución do contrato non poderá ser superior a quince días hábiles, contados desde a formalización. De se exceder este prazo, o contrato poderá ser resolto, salvo que o atraso se deba a causas alleas á Administración contratante e ao contratista e así se faga constar na correspondente resolución motivada.»

Dezanove. O artigo 99.1 queda redactado da seguinte forma:

«Artigo 99. *Pregos de cláusulas administrativas particulares.*

1. Os pregos de cláusulas administrativas particulares deberanse aprobar previamente á autorización do gasto ou conxuntamente con ela, e sempre antes da licitación do contrato ou, de non existir esta, antes da súa adxudicación.»

Vinte. Dáselle unha nova redacción ao artigo 100.1:

«Artigo 100. *Pregos de prescricións técnicas.*

1. O órgano de contratación aprobará, con anterioridade á autorización do gasto ou conxuntamente con ela, e sempre antes da licitación do contrato ou, de non existir esta, antes da súa adxudicación, os pregos e documentos que conteñan as prescricións técnicas particulares que deban rexer a realización da prestación e definan as súas calidades, de conformidade cos requisitos que para cada contrato establece esta lei.»

Vinte e un. Dáselles unha nova redacción ás letras c) e d) do número 1 do artigo 130, e a letra d) actual pasa ser a letra e) nova, todo isto da seguinte forma:

«Artigo 130. *Presentación da documentación acreditativa do cumprimento de requisitos previos*

....

c) Unha declaración responsable de non estar incurso en prohibición de contratar. Esta declaración incluírá a manifestación de estar ao día no cumprimento das obrigas tributarias e coa Seguridade Social impostas polas disposicións vixentes, sen prexuízo de que a xustificación acreditativa de tal requisito deba ser presentada, antes da adxudicación, polo empresario a cuxo favor se vaia efectuar esta.

d) De ser o caso, un enderezo de correo electrónico en que efectuar as notificacións.

e) Para as empresas estranxeiras, nos casos en que o contrato se vaia executar en España, a declaración de someterse á xurisdición dos xulgados e tribunais españois de calquera orde, para todas as incidencias que de modo directo ou indirecto puideren xurdir do contrato, con renuncia, de ser o caso, ao foro xurisdiccional estranxeiro que puider corresponder ao licitante.»

Vinte e dous. O artigo 135 queda redactado nos seguintes termos:

«Artigo 135. *Clasificación das ofertas, adxudicación do contrato e notificación da adxudicación.*

1. O órgano de contratación clasificará, por orde decrecente, as proposicións presentadas e que non fosen declaradas desproporcionadas ou anormais conforme o sinalado no artigo seguinte. Para realizar a dita clasificación, atenderá aos criterios de adxudicación sinalados no prego ou no anuncio e poderá solicitar para iso cantos informes técnicos considere pertinentes. Cando o único criterio que cumpra considerar sexa o prezo, entenderase que a oferta economicamente máis vantaxosa é a que incorpora o prezo máis baixo.

2. O órgano de contratación requirirá o licitador que presentase a oferta economicamente máis vantaxosa para que, dentro do prazo de dez días hábiles, contados desde o seguinte a aquel en que recibise o requirimento, presente a documentación xustificativa de estar ao día no cumprimento das súas obrigas tributarias e coa Seguridade Social ou autorice o órgano de contratación para obter de forma directa a acreditación diso, de dispor efectivamente dos medios que se compromete a dedicar ou adscribir á execución do contrato conforme o artigo 53.2, e de ter constituído a garantía definitiva que sexa procedente. Os correspondentes certificados poderán ser expedidos por medios electrónicos, informáticos ou telemáticos, salvo que se estableza outra cousa nos pregos.

As normas autonómicas de desenvolvemento desta lei poderán fixar un prazo maior ao previsto neste parágrafo, sen que se exceda o de vinte días hábiles.

De non se atender adecuadamente o requirimento no prazo sinalado, entenderase que o licitador retirou a súa oferta, e nese caso procederase a solicitar a mesma

documentación ao licitador seguinte, pola orde en que quedasen clasificadas as ofertas.

3. O órgano de contratación deberá adxudicar o contrato dentro do cinco días hábiles seguintes ao da recepción da documentación. Nos procedementos negociados e de diálogo competitivo, a adxudicación concretará e fixará os termos definitivos do contrato.

Non se poderá declarar deserta unha licitación cando exista algunha oferta ou proposición que sexa admisible de acordo cos criterios que figuren no prego.

4. A adxudicación deberá ser motivada, notificaráselles aos candidatos ou licitadores e, simultaneamente, publicárase no perfil de contratante.

A notificación deberá conter, en todo caso, a información necesaria que lle permita ao licitador excluído ou candidato descartado interpor, conforme o artigo 310, recurso suficientemente fundado contra a decisión de adxudicación. En particular, expresará os seguintes aspectos:

a) En relación cos candidatos descartados, a exposición resumida das razóns polas cales se desestimou a súa candidatura.

b) Con respecto aos licitadores excluídos do procedemento de adxudicación, tamén en forma resumida, as razóns polas cales non se admitiu a súa oferta.

c) En todo caso, o nome do adxudicatario, as características e vantaxes da proposición do adxudicatario determinantes de que fose seleccionada a oferta deste con preferencia ás que presentaron os restantes licitadores cuxas ofertas foron admitidas.

Será de aplicación á motivación da adxudicación a excepción de confidencialidade contida no artigo 137.

En todo caso, na notificación e no perfil de contratante indicárase o prazo en que se debe proceder á súa formalización conforme o artigo 140.3.

A notificación farase por calquera dos medios que permiten deixar constancia da súa recepción polo destinatario. En particular, poderase efectuar por correo electrónico ao enderezo que os licitadores ou candidatos designasen ao presentaren as súas proposicións, nos termos establecidos no artigo 28 da Lei 11/2007, do 22 de xuño, de acceso electrónico dos cidadáns aos servizos públicos. Porén, o prazo para considerar rexeitada a notificación, cos efectos previstos no artigo 59.4 da Lei 30/1992, do 26 de novembro, será de cinco días.»

Vinte e tres. Dáselle unha nova redacción ao número 4 do artigo 136:

«Artigo 136. *Ofertas con valores anormais ou desproporcionados.*

...

4. Se o órgano de contratación, considerando a xustificación efectuada polo licitador e os informes mencionados no número anterior, estimar que a oferta non pode ser cumprida como consecuencia da inclusión de valores anormais ou desproporcionados, excluíraa da clasificación e acordará a adxudicación a favor da proposición economicamente máis vantaxosa, de acordo coa orde en que fosen clasificadas conforme o sinalado no número 1 do artigo anterior».

Vinte e catro. Dáselle unha nova redacción á rúbrica do artigo 137, nos seguintes termos: «Artigo 137. Información non publicable», e suprímese o número 1 do artigo 137, quedando como único o número 2.

Vinte e cinco. Dáselle unha nova redacción ao artigo 138:

«Artigo 138. *Publicidade da formalización dos contratos.*

1. A formalización dos contratos cuxa contía sexa igual ou superior ás cantidades indicadas no artigo 122.3 publicárase no perfil de contratante do órgano de contratación indicando, como mínimo, os mesmos datos mencionados no anuncio da adxudicación.

2. Cando a contía do contrato sexa igual ou superior a 100.000 euros ou, no caso de contratos de xestión de servizos públicos, cando o orzamento de gastos de primeiro establecemento sexa igual ou superior ao dito importe, ou o seu prazo de duración exceda os cinco anos, deberase publicar, ademais, no «Boletín Oficial del Estado» ou nos respectivos diarios ou boletíns oficiais das comunidades autónomas ou das provincias, un anuncio en que se dea conta da dita formalización, nun prazo non superior a corenta e oito días contados desde a data desta.

Cando se trate de contratos suxeitos a regulación harmonizada o anuncio deberase enviar, no prazo sinalado no parágrafo anterior, ao «Diario Oficial de la Unión Europea» e publicarse no «Boletín Oficial del Estado».

3. No caso de contratos de servizos comprendidos nas categorías 17 a 27 do anexo II e de contía igual ou superior a 193.000 euros, o órgano de contratación comunicará a adxudicación á Comisión Europea, indicando se considera procedente a súa publicación.

4. Nos casos a que se refire o artigo anterior, o órgano de contratación poderá non publicar determinada información relativa á adxudicación e formalización do contrato, xustificándoo debidamente no expediente.»

Vinte e seis. O artigo 139.2 queda redactado da seguinte forma:

«Artigo 139. *Renuncia á celebración do contrato e desistencia do procedemento de adxudicación pola Administración.*

...

2. A renuncia á celebración do contrato ou a desistencia do procedemento só poderán ser acordadas polo órgano de contratación antes da adxudicación. En ambos os casos os candidatos ou licitadores serán compensados polos gastos en que incorresen, na forma prevista no anuncio ou no prego, ou de acordo cos principios xerais que rexen a responsabilidade da Administración.»

Vinte e sete. O artigo 140 queda redactado na forma que segue:

«Artigo 140. *Formalización dos contratos.*

1. Os contratos que celebren as administracións públicas deberán formalizarse en documento administrativo que se axuste con exactitude ás condicións da licitación, constituíndo o dito documento título suficiente para acceder a calquera rexistro público. No entanto, o contratista poderá solicitar que o contrato se eleve a escritura pública, e serán pola súa conta os correspondentes gastos. En ningún caso se poderán incluír no documento en que se formalice o contrato cláusulas que impliquen alteración dos termos da adxudicación.

2. No caso dos contratos menores definidos no artigo 122.3 observarase, en canto á súa formalización, o disposto no artigo 95.

3. Se o contrato é susceptible de recurso especial en materia de contratación conforme o artigo 310.1, a formalización non se poderá efectuar antes de que transcorran quince días hábiles desde que se remita a notificación da adxudicación aos licitadores e candidatos. As comunidades autónomas poderán incrementar este prazo, sen que exceda dun mes.

O órgano de contratación requirirá o adxudicatario para que formalice o contrato en prazo non superior a cinco días contados desde o seguinte a aquel en que recibise o requirimento, unha vez transcorrido o prazo previsto no parágrafo anterior sen que se interpuxese recurso que comporte a suspensión da formalización do contrato. De igual forma procederá cando o órgano competente para a resolución do recurso levantase a suspensión.

Nos restantes casos, a formalización do contrato deberá efectuarse non máis tarde do quince días hábiles seguintes a aquel en que se reciba a notificación da adxudicación aos licitadores e candidatos na forma prevista no artigo 135.4.

4. Cando por causas imputables ao adxudicatario non se formalizase o contrato dentro do prazo indicado, a Administración poderá acordar a incautación sobre a garantía definitiva do importe da garantía provisoria que, de ser o caso, exixise.

Se as causas da non formalización foren imputables á Administración, indemnizarase o contratista polos danos e perdas que a demora lle puider ocasionar.

5. Non se poderá iniciar a execución do contrato sen a súa formalización previa, excepto nos casos previstos no artigo 97 desta lei.»

Vinte e oito. Os números 1 e 2 do artigo 145 quedan redactados como segue:

«Artigo 145. *Adjudicación.*

1. Cando o único criterio que cumpra considerar para seleccionar o adxudicatario do contrato sexa o do prezo, a adjudicación deberá recaer no prazo máximo de quince días contados desde o seguinte ao de apertura das proposicións.

2. Cando, para a adjudicación do contrato, se deban ter en conta unha pluralidade de criterios, o prazo máximo para efectuar a adjudicación será de dous meses contados desde a apertura das proposicións, salvo que se establecese outro no prego de cláusulas administrativas particulares.»

Vinte e nove. Dáselle unha nova redacción ao artigo 174.1, letra a), nos termos que seguen:

«Artigo 174. *Adjudicación dos contratos suxeitos a regulación harmonizada.*

1. A adjudicación dos contratos suxeitos a regulación harmonizada rexerá polas normas establecidas no capítulo anterior coas seguintes adaptacións:

a) Non serán de aplicación as normas establecidas no segundo parágrafo do número 2 do artigo 134 sobre intervención do comité de expertos para a valoración de criterios subxectivos; nos números 1 e 2 do artigo 136 sobre criterios para apreciar o carácter anormal ou desproporcionado das ofertas; no artigo 140 sobre formalización dos contratos, sen prexuízo de que se deba observar o prazo establecido no seu número 3 e o previsto no número 5; no artigo 144 sobre exame das proposicións e proposta de adjudicación; e no artigo 156 sobre os supostos en que é posible acudir a un procedemento negociado para adjudicar contratos de xestión de servizos públicos.»

Trinta. O artigo 181.3 queda redactado da seguinte forma:

«Artigo 181.3. *Procedemento de celebración de acordos marco.*

...

3. Nos casos a que se refire o artigo 137, o órgano de contratación poderá non publicar determinada información relativa á celebración do acordo marco, xustificándoo debidamente no expediente.»

Trinta e un. Engádese o punto 5 ao artigo 182, coa seguinte redacción:

«Artigo 182.5. Nos procedementos de adjudicación a que se refiren os números anteriores poderase efectuar a formalización do contrato sen necesidade de observar o prazo de espera previsto no artigo 140.3.»

Trinta e dous. Engádese o número 6 ao artigo 186, coa seguinte redacción:

«Artigo 186.6. A adjudicación prevista no número 4 deste artigo poderá ir seguida de forma inmediata pola formalización do contrato.»

Trinta e tres. Modifícase o artigo 206, suprimindo a letra d) e dando nova enumeración alfabética sucesiva ás restantes letras.

Trinta e catro. Suprímese o número 1 do artigo 208, dando nova numeración sucesiva aos restantes números.

Trinta e cinco. Engádese un novo parágrafo final á disposición adicional terceira, que queda redactada da seguinte forma:

«Disposición adicional terceira. *Réxime de contratación dos órganos constitucionais do Estado e dos órganos lexislativos e de control autonómicos.*

Os órganos competentes do Congreso dos Deputados, do Senado, do Consello Xeral do Poder Xudicial, do Tribunal Constitucional, do Tribunal de Contas, do Defensor do Pobo, das asembleas lexislativas das comunidades autónomas e das institucións autonómicas análogas ao Tribunal de Contas e ao Defensor do Pobo axustarán a súa contratación ás normas establecidas nesta lei para as administracións públicas.

Así mesmo, os órganos competentes das Cortes Xerais establecerán, de ser o caso, o órgano que deba coñecer, no seu ámbito de contratación, do recurso especial regulado no libro VI desta lei, respectando as condicións de cualificación, independencia e inamobilidade previstas no dito título.»

Trinta e seis. Engádese un novo número 3 á disposición adicional décimo novena, coa seguinte redacción:

«3. En cumprimento do principio de transparencia na contratación e de eficacia e eficiencia da actuación administrativa, fomentárase e preferírase o emprego de medios electrónicos, informáticos e telemáticos nos procedementos recollidos nesta lei por parte dos licitadores ou os candidatos. En todo caso, no ámbito da Administración xeral do Estado e dos organismos públicos vinculados ou dependentes desta, os ditos medios deberán estar dispoñibles en relación coa totalidade dos procedementos de contratación da súa competencia.»

Trinta e sete. Modifícase a disposición adicional vixésimo sétima, que queda redactada da seguinte forma:

«Disposición adicional vixésimo sétima. *Prácticas contrarias á libre competencia.*

Os órganos de contratación, a Xunta Consultiva de Contratación Administrativa do Estado e os órganos competentes para resolver o recurso especial a que se refire o artigo 310 desta lei notificarán á Comisión Nacional da Competencia todos os feitos de que teñan coñecemento no exercicio das súas funcións que poidan constituír infracción á lexislación de defensa da competencia. En particular, comunicarán calquera indicio de acordo, decisión ou recomendación colectiva, ou práctica concertada ou conscientemente paralela entre os licitadores, que teña por obxecto, produza ou poida producir o efecto de impedir, restrinxir ou falsear a competencia no proceso de contratación.»

Trinta e oito. Modifícanse os números 1 e 2 da disposición derradeira sétima, considerando lexislación exclusiva do Estado o artigo 320 e suprimindo a mención do artigo 37.5 e engadindo como preceptos non básicos os números 1 e 3 do artigo 311, que queda redactado da seguinte forma:

«Disposición derradeira sétima. *Títulos competenciais.*

1. Os artigos 21 e 320 e as disposicións derradeiras terceira e cuarta dítanse ao abeiro das competencias atribuídas ao Estado pola regra 6.^a do artigo 149.1.6.^a da Constitución, e son de aplicación xeral.

2. Os restantes artigos desta lei constitúen lexislación básica ditada ao abeiro do artigo 149.1.18.^a da Constitución e, en consecuencia, son de aplicación xeral a todas as administracións públicas e organismos e entidades dependentes delas. No entanto, non terán carácter básico os seguintes artigos ou partes deles: letra a) do

número 1 do artigo 15; letra a) do número 1 do artigo 16; números 1 a 5 do artigo 24; artigo 29.4; artigo 48.2; artigo 49.2.c); artigo 53; artigo 60; artigo 71; artigo 81; artigo 82; parágrafo segundo do número 1 do artigo 83; segundo parágrafo do número 3 e número 5 do artigo 93; artigo 95.2; letras a) e c) do número 2 do artigo 96; letras b) e c) do artigo 97.1; números 1 e 2 do artigo 98; números 4, 5 e 6 do artigo 99; artigo 100; números 1.e) e 4 do artigo 107; artigo 108; artigo 109; artigo 110; letras e), g), h), i), j) e número 1) do artigo 120; segundo parágrafo do número 3 do artigo 136; artigo 140; número 2 do artigo 189; artigo 190; artigo 191; artigo 195.2; números 3 a 8, ambos inclusive, do artigo 196; segundo inciso do artigo 205.2; números 3 e 5 do artigo 207; artigo 212; artigo 213.2; artigo 215; número 1 do artigo 216; números 3, salvo a previsión da letra b), e 4 do artigo 217; artigo 218; número 1 do artigo 224; artigo 227; artigo 231; números 2 e 3 do artigo 234; artigo 237; número 5 do artigo 238; artigo 239; artigo 263; artigo 266; números 2 e 3 do artigo 268; artigo 270; artigo 271; artigo 273; artigo 274; números 2 e 3 do artigo 276; número 3 do artigo 277; números 2 e 3 do artigo 285; números 3, 4, 5 e 6 do artigo 286; artigo 287; artigos 291 a 293; artigos 295 a 299, ambos inclusive; artigo 309; artigo 311.1 e 3; letra a) do número 1 da disposición adicional primeira; disposición adicional cuarta; disposición adicional vixésima; disposición adicional vixésimo terceira; disposición adicional vixésimo cuarta; disposición adicional vixésimo quinta; disposición adicional vixésimo sexta; disposición adicional vixésimo sétima; disposición adicional vixésimo oitava; disposición adicional trixésima; disposición transitoria terceira; disposición transitoria cuarta; disposición derradeira segunda; disposición derradeira quinta; disposición derradeira sexta; disposición derradeira oitava, e disposición derradeira novena.

Para os mesmos efectos previstos no parágrafo anterior terán a consideración de mínimas as exixencias que para os contratos menores se establecen no artigo 95.1 e terán a consideración de máximas as seguintes porcentaxes, contías ou prazos:

A porcentaxe do 5 por cento do artigo 83.1 e 2.

A porcentaxe do 3 por cento do artigo 91.2.

As contías do artigo 122.3.

Os prazos dun mes establecidos nos números 2 e 4 do artigo 205.»

Artigo segundo. *Modificación da Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais.*

Un. O título VII da Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais pasa a denominarse «Reclamacións nos procedementos de adxudicación e declaración de nulidade dos contratos».

Dous. Modifícanse os artigos 101 a 108 da Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais, que pasan a integrar o capítulo I do título a que se refire o número anterior e quedan redactados da forma que segue:

«TÍTULO VII

Reclamacións nos procedementos de adxudicación e declaración de nulidade dos contratos

CAPÍTULO I

Reclamacións nos procedementos de adxudicación dos contratos

Artigo 101. Competencia.

1. Os órganos indicados no artigo 311 da Lei 30/2007, do 30 de outubro, de contratos do sector público, serán os competentes nos seus ámbitos respectivos e en relación coas entidades enumeradas no número 1 do artigo 3 desta lei, así como coas que estean adscritas ou vinculadas a elas, ou coas que outorgasen un dereito especial ou exclusivo, para exercer as seguintes competencias respecto dos contratos cuxos procedementos de adxudicación se regulan:

- a) Resolver as reclamacións e cuestións de nulidade que se promovan por infracción das normas contidas nesta lei.
- b) Acordar as medidas cautelares de carácter provisorio necesarias para asegurar a eficacia da resolución que no seu momento se dite.
- c) Fixar as indemnizacións que procedan, logo da correspondente reclamación de danos e perdas, por infracción, así mesmo, das disposicións contidas nesta lei.

2. Se a entidade contratante for unha asociación das recollidas no número 1 do artigo 3 e houber varias administracións públicas de referencia pola diferente adscrición ou vinculación dos seus membros, ou unha soa entidade contratante estiver no mesmo suposto, por operar en varios sectores dos incluídos nos artigos 7 a 12, a reclamación poderá ser presentada ante calquera dos órganos competentes mencionados no artigo 311 da Lei 30/2007, do 30 de outubro, de contratos do sector público, que estará obrigado a resolver.

3. Para os efectos do número 1, cando a entidade contratante teña relación con máis dunha Administración pública, en razón da súa adscrición ou vinculación formal e do título administrativo que explota, a reclamación deberá presentarse ante o órgano independente que teña atribuída a competencia para resolver as reclamacións no ámbito da Administración que outorgase o título administrativo.

Artigo 102. Lexitimación.

Poderá interpor a correspondente reclamación toda persoa física ou xurídica cuxos dereitos ou intereses lexitimos se visen prexudicados ou poidan resultar afectados polas decisións obxecto de reclamación.

Artigo 103. Solicitude de medidas provisionais.

1. Antes de interporen a reclamación regulada neste título, as persoas físicas e xurídicas, lexitimadas para iso conforme o disposto no artigo anterior, poderán solicitar ante o órgano competente para resolver a reclamación a adopción de medidas provisionais. Tales medidas irán dirixidas a corrixir infraccións de procedemento ou impedir que se causen outros prexuízos aos intereses afectados, e poderán estar incluídas, entre elas, as destinadas a suspender ou a facer que se suspenda o procedemento de adxudicación do contrato en cuestión ou a execución de calquera decisión adoptada polos órganos de contratación.

2. O órgano competente para resolver a reclamación deberá adoptar a decisión en forma motivada sobre as medidas provisionais dentro dos cinco días hábiles seguintes ao da presentación do escrito en que se soliciten.

Para estes efectos, o órgano decisorio, no mesmo día en que se reciba a petición da medida provisoria, comunicará esta á entidade contratante, que disporá dun prazo de dous días hábiles para presentar as alegacións que considere oportunas referidas á adopción das medidas solicitadas ou ás propostas polo propio órgano decisorio. Se, transcorrido este prazo, non se formularen alegacións, continuarase o procedemento.

Se, antes de ditar resolución, se interpuxo a reclamación, o órgano decisorio acumulará a esta a solicitude de medidas provisionais e resolverá sobre elas na forma prevista no artigo 105, sen que sexa de aplicación, en tal caso, o prazo para entender desestimada a solicitude por silencio administrativo.

Contra as resolucións ditadas neste procedemento non caberá ningún recurso, sen prexuízo dos que procedan contra as resolucións que se diten no procedemento principal.

3. Cando da adopción das medidas provisionais poidan derivar prexuízos de calquera natureza, a resolución poderá impor a constitución de caución ou garantía suficiente para responder deles, sen que aquelas produzan efectos ata que a dita caución ou garantía sexa constituída.

Regulamentariamente determinaranse a contía e forma da garantía que se deberá constituír así como os requisitos para a súa devolución.

4. A suspensión do procedemento que se poida acordar preventivamente non afectará, en ningún caso, o prazo concedido para a presentación de ofertas ou proposicións polos interesados.

5. As medidas provisionais que se soliciten e acorden con anterioridade á presentación da reclamación decaerán unha vez que transcorra o prazo establecido para a súa interposición sen que o interesado a deducise.

Artigo 104. *Iniciación do procedemento.*

1. Todo aquel que se propoña interpor reclamación nos termos previstos no artigo 101 deberá anunciálo previamente mediante escrito presentado ante a entidade contratante no prazo previsto no número seguinte para a interposición da reclamación. No dito escrito deberase indicar o acto do procedemento contra o cal irá dirixida a reclamación que se interpoña.

2. O procedemento iniciarase mediante escrito que se deberá presentar no prazo de quince días hábiles, contados desde o seguinte ao da publicación, de ser o caso, da licitación do contrato no «Diario Oficial de la Unión Europea» cando se interpoña contra a dita licitación, desde que se anuncie no perfil de contratante do órgano de contratación ou desde que os licitadores teñan coñecemento da infracción que se denuncia.

3. A presentación do escrito de interposición deberase facer necesariamente no rexistro do órgano competente para resolver a reclamación.

4. No escrito de interposición farase constar o acto reclamado, o motivo que fundamente a reclamación, os medios de proba de que pretenda valerse o reclamante e, de ser o caso, as medidas cautelares mencionadas no artigo anterior cuxa adopción solicite.

A este escrito xuntarase:

a) O documento que acredite a representación do comparecente, salvo que figure unido ás actuacións doutro procedemento pendente ante o mesmo órgano, caso en que se poderá solicitar que se expida certificación para a súa unión ao procedemento.

b) O documento ou documentos que acrediten a lexitimación do demandante cando a teña por lla ter transmitido outro por herdanza ou por calquera outro título.

c) A copia ou o traslado do acto expreso que se impugne, ou indicación do expediente en que recaese o acto, o xornal oficial ou perfil de contratante en que se publicou.

d) O documento ou documentos en que funde o seu dereito.

e) O xustificante de ter dado cumprimento ao establecido no número 1 deste artigo. Sen este xustificante non se dará curso ao escrito de interposición, aínda que a súa omisión se poderá emendar de conformidade co establecido no número seguinte.

5. Para a emenda dos defectos que poidan afectar o escrito de reclamación, requirirase o interesado co fin de que, nun prazo de tres días hábiles, emende a falta ou xunte os documentos preceptivos, con indicación de que, se así non o fixer, se terá por desistido da súa petición, quedando suspendida a tramitación do expediente cos efectos previstos no número 5 do artigo 42 da Lei 30/1992, do 26 de novembro, de réxime xurídico das administracións públicas e do procedemento administrativo común.

6. Unha vez interposta a reclamación, se o acto impugnado é o de adxudicación, quedará en suspenso a tramitación do expediente de contratación.

Artigo 105. *Tramitación do procedemento.*

1. O procedemento para tramitar as reclamacións rexerese polas disposicións da Lei 30/1992, do 26 de novembro, coas especialidades que se recollen nos números seguintes.

2. Interposta a reclamación, o órgano encargado de a resolver notificarallo no mesmo día á entidade contratante con remisión da copia do escrito de interposición e reclamará o expediente de contratación á entidade que o tramitou, que o deberá remitir dentro dos dous días hábiles seguintes xunto co correspondente informe.

3. Dentro dos cinco días hábiles seguintes ao da interposición da reclamación, dará traslado dela aos restantes interesados, e concederalles un prazo de cinco días hábiles para formular alegacións, e, de forma simultánea a este trámite, decidirá acerca das medidas cautelares de terse solicitado a adopción dalgunha no escrito de interposición da reclamación ou de terse procedido á acumulación prevista no parágrafo terceiro do artigo 103.2. Á adopción destas medidas será de aplicación, en todo caso, o disposto no artigo 103 en canto á audiencia da entidade contratante. Serán igualmente aplicables os números 3 e 4 do citado artigo.

Neste mesmo acto resolverá, de ser o caso, sobre se procede ou non o mantemento da suspensión automática prevista no artigo anterior. De as medidas provisionais se teren solicitado despois da interposición do recurso, o órgano competente resolverá sobre elas nos termos previstos no parágrafo anterior sen suspender o procedemento principal.

4. Os feitos relevantes para a decisión da reclamación poderanse acreditar por calquera medio de proba admisible en dereito. Cando os interesados o soliciten ou o órgano de resolución non teña por certos os feitos alegados polos interesados ou a natureza do procedemento o exixa, poderase acordar a apertura do período de proba por un prazo de dez días hábiles, co fin de que se poidan practicar cantas xulgue pertinentes.

O órgano competente para resolver a reclamación poderá rexeitar as probas propostas polos interesados cando sexan manifestamente improcedentes ou innecesarias, mediante resolución motivada.

A práctica das probas anunciaráselles con antelación suficiente aos interesados.

5. O órgano competente para a resolución da reclamación deberá, en todo caso, garantir a confidencialidade e o dereito á protección dos segredos comerciais en relación coa información contida no expediente de contratación, sen prexuízo de que poida coñecer e tomar en consideración a dita información á hora de resolver. Corresponderá ao dito órgano resolver acerca de como garantir a confidencialidade e o segredo da información que conste no expediente de contratación, sen que por iso resulten prexudicados os dereitos dos demais interesados á protección xurídica efectiva e ao dereito de defensa no procedemento.

Artigo 106. *Resolución.*

1. Unha vez recibidas as alegacións dos interesados, ou transcorrido o prazo sinalado para a súa formulación, e o da proba, de ser o caso, o órgano competente deberá resolver a reclamación dentro do cinco días hábiles seguintes, e a continuación notificaráselles a resolución a todos os interesados.

2. A resolución da reclamación estimará en todo ou en parte ou desestimarás as pretensións formuladas ou declarará a súa non admisión, decidindo motivadamente cantas cuestións se tivesen formulado. En todo caso, a resolución será congruente coa petición e, de ser procedente, pronunciarase sobre a anulación das decisións ilegais adoptadas durante o procedemento de adxudicación, incluíndo a supresión das características técnicas, económicas ou financeiras discriminatorias contidas no anuncio de licitación, anuncio indicativo, pregos, condicións reguladoras do contrato ou calquera outro documento relacionado coa licitación ou adxudicación, así como, se procede, sobre a retroacción de actuacións.

3. Así mesmo, por solicitude do interesado e se procede, poderáselle impor á entidade contratante a obriga de indemnizar a persoa interesada polos danos e perdas que lle puidese ocasionar a infracción legal que dese lugar á reclamación.

4. A resolución deberá acordar, tamén, o levantamento da suspensión do acto de adxudicación se no momento de a ditar continúa suspendido, así como das restantes medidas cautelares que se acordasen e a devolución das garantías cuxa constitución se exixise para a súa efectividade, de proceder.

5. No caso de que o órgano competente aprecie temeridade ou mala fe na interposición da reclamación ou na solicitude de medidas cautelares, poderá acordar a imposición dunha multa ao responsable dela. O importe da multa será de entre 1.000 e 15.000 euros e a súa contía determinarase en función da mala fe apreciada e o prexuízo ocasionado á entidade contratante e aos restantes licitadores. As contías indicadas neste número serán actualizadas cada dous anos mediante orde ministerial, por aplicación do índice de prezos de consumo calculado polo Instituto Nacional de Estatística.

Artigo 107. *Determinación da indemnización.*

1. Cando proceda a indemnización prevista no número 3 do artigo anterior, esta fixarase atendendo no posible aos criterios dos números 2 e 3 do artigo 141 da Lei 30/1992, do 26 de novembro.

2. A indemnización deberá resarcir o reclamante, cando menos, dos gastos ocasionados pola preparación da oferta ou a participación no procedemento de contratación.

Artigo 108. *Efectos da resolución.*

1. Contra a resolución ditada neste procedemento só caberá a interposición de recurso contencioso-administrativo conforme o disposto no artigo 10, letras k) e l) do número 1, e no artigo 11, letra f) do seu número 1 da Lei 29/1998, do 13 de xullo, reguladora da xurisdición contencioso-administrativa.

Non procederá a revisión de oficio regulada no artigo 34 desta lei e no capítulo I do título VII da Lei 30/1992, do 26 de novembro, da resolución nin de ningún dos actos ditados polos órganos regulados no artigo 311. Tampouco estarán suxeitos a fiscalización polos órganos de control financeiro das administracións a que cada un deles estea adscrito.

2. Sen prexuízo do disposto no número anterior, a resolución será directamente executiva e resultará de aplicación, de ser o caso, o disposto no artigo 97 da Lei 30/1992, do 26 de novembro.»

Tres. Modifícase a denominación do capítulo II do título VII da Lei 31/2007, do 30 de outubro, sobre procedementos de contratación nos sectores da auga, a enerxía, os

transportes e os servizos postais, que pasa a denominarse «Supostos especiais de nulidade dos contratos».

Catro. Modifícanse, así mesmo, os artigos 109, 110 e 111 da citada lei, que pasa a integrar o capítulo II a que se refire o número anterior, e quedan redactados como segue:

«CAPÍTULO II

Supostos especiais de nulidade dos contratos

Artigo 109. *Declaración da nulidade do contrato.*

1. Os contratos celebrados de conformidade co disposto nesta lei serán nulos nos seguintes casos:

a) Cando o contrato se adxudicase sen cumprir previamente co requisito de publicación do anuncio de licitación no «Diario Oficial de la Unión Europea», na forma prevista no artigo 65.

b) Cando, malia terse interposto unha reclamación por infracción das normas desta lei, se formalizase o contrato sen ter en conta a suspensión automática do acto de adxudicación nos casos en que for procedente, e sen esperar a que se dite resolución sobre o mantemento ou non da suspensión do acto impugnado.

c) Cando non se respectase o prazo de quince días hábiles previsto no artigo 83.3 antes de proceder á formalización do contrato sempre que por esta causa o licitador se vise privado da posibilidade de interpor o recurso regulado nos artigos 101 e seguintes e, ademais, concorrese con algunha infracción dos preceptos que regulan o procedemento de adxudicación dos contratos que lle impedisese obter esta.

d) Cando se trate da adxudicación dun contrato específico baseado nun sistema dinámico de contratación no que estiveren admitidos varios empresarios, sempre que o contrato que se vai adxudicar teña un importe superior aos limiares establecidos no artigo 16 e se incumprisen as normas sobre adxudicación de tales contratos establecidas no artigo 46.

2. Non obstante o disposto no número anterior, non procederá a declaración de nulidade a que se refire o dito número no suposto da letra a) de concorreren conxuntamente as tres circunstancias seguintes:

a) Que, de conformidade co criterio da entidade contratante, o contrato estea incluído nalgún dos supostos de exención de publicación do anuncio de licitación no «Diario Oficial de la Unión Europea» previstos nesta lei.

b) Que o órgano de contratación publique no «Diario Oficial de la Unión Europea» un anuncio de transparencia previa voluntaria no cal se manifeste a súa intención de celebrar o contrato e que conteña os seguintes datos:

- identificación do órgano de contratación
- descrición da finalidade do contrato
- xustificación da decisión de adxudicar o contrato sen o requisito de publicación
- identificación do adxudicatario do contrato
- calquera outra información que o órgano de contratación considere relevante

c) Que o contrato non se formalizase ata transcorridos dez días hábiles desde a publicación do anuncio.

3. Non procederá a declaración de nulidade a que se refire este artigo no suposto da letra d) de concorreren conxuntamente as dúas condicións seguintes:

a) Que o órgano de contratación lles notificase a todos os licitadores afectados a adxudicación do contrato e, se o solicitan, os motivos do rexeitamento da súa

candidatura ou da súa proposición e das características da proposición do adxudicatario que foron determinantes da adxudicación ao seu favor, sen prexuízo do disposto no artigo 20.2 en canto aos datos cuxa comunicación non for procedente.

b) Que o contrato non se celebre ata transcorridos quince días hábiles contados desde o seguinte ao da remisión da notificación aos licitadores afectados.

Artigo 110. Consecuencias xurídicas da declaración de nulidade regulada no artigo anterior.

1. As consecuencias xurídicas da declaración de nulidade polas causas previstas no artigo anterior serán determinadas polo órgano que a acorde, quen poderá declarar a nulidade de pleno dereito ou limitar o alcance da anulación ás obrigas que estean aínda por executar. Neste último suposto, observarase o establecido no número seguinte en canto á aplicación de sancións.

2. Non obstante o disposto no número anterior, o órgano competente para declarar a nulidade poderá non declárala e acordar o mantemento dos efectos do contrato se, atendendo ás circunstancias concorrentes, considera que existen razóns imperiosas de interese xeral que o exixan.

Só se considerará que os intereses económicos constitúen as razóns imperiosas mencionadas no primeiro parágrafo deste número nos casos excepcionais en que a nulidade do contrato dea lugar a consecuencias desproporcionadas.

Así mesmo, non se considerará que constitúen razóns imperiosas de interese xeral os intereses económicos directamente vinculados ao contrato en cuestión, tales como os custos derivados do atraso na execución do contrato, da convocatoria dun novo procedemento de contratación, do cambio do operador económico que deberá executar o contrato ou das obrigas xurídicas derivadas da nulidade.

3. No caso previsto no número anterior, a declaración de nulidade poderá ser substituída por algunha das sancións alternativas seguintes:

a) A imposición de multas á entidade contratante por un importe que non poderá ser inferior ao 5 por cento nin superar o 20 por cento do prezo de adxudicación do contrato.

Para determinar a contía na imposición das multas, o órgano competente tomará en consideración a reiteración, a porcentaxe do contrato que fose executado ou o dano causado aos intereses públicos ou, de ser o caso, ao licitador, de tal forma que estas sexan eficaces, proporcionadas e disuasorias.

b) A redución proporcionada da duración do contrato. Neste caso, o órgano competente tomará en consideración a reiteración, a porcentaxe do contrato que fose executado ou o dano causado aos intereses públicos ou, de ser o caso, ao licitador. Así mesmo, determinará a indemnización que corresponda ao contratista polo lucro cesante derivado da redución temporal do contrato, sempre que a infracción que motive a sanción alternativa non lle sexa imputable.

4. O disposto en todos os números anteriores entenderase sen prexuízo das sancións disciplinarias que corresponda impor ao responsable das infraccións legais.

Artigo 111. Interposición da cuestión de nulidade.

1. A cuestión de nulidade deberase promover ante o órgano previsto no artigo 101, que será o competente para tramitar o procedemento e resolvela.

2. Poderá formular a cuestión de nulidade toda persoa física ou xurídica cuxos dereitos ou intereses lexítimos se visen prexudicados ou poidan resultar afectados polos supostos de nulidade do artigo 109 e, en todo caso, os licitadores. O órgano competente, porén, poderá non admitila cando o interesado tivese interposto o recurso especial regulado nos artigos 101 e seguintes sobre o mesmo acto tendo

respectado o órgano de contratación a suspensión do acto impugnado e a resolución ditada.

3. O prazo para a interposición da cuestión de nulidade será de trinta días hábiles contados:

a) Desde a publicación no «Diario Oficial de la Unión Europea» da adjudicación do contrato na forma prevista nos artigos 63, 67 e 69, incluíndo as razóns xustificativas da non publicación da licitación no diario citado.

b) Ou desde a notificación aos licitadores afectados dos motivos do rexeitamento da súa candidatura ou da súa proposición e das características da proposición do adjudicatario que foron determinantes da adjudicación ao seu favor, a que se refiren os artigos 83 e 84.

4. Fóra dos casos previstos no número anterior, a cuestión de nulidade deberase interpor antes de que transcorran seis meses contados desde a adjudicación do contrato.

5. A cuestión de nulidade tramitarase de conformidade co disposto nos artigos 104 e seguintes coas seguintes excepcións:

a) Non será de aplicación o disposto no artigo 104.1 da citada lei en canto á existencia de anunciar a interposición do recurso.

b) A interposición da cuestión de nulidade non producirá efectos suspensivos de ningunha clase por si soa.

c) O prazo establecido no artigo 103.2, parágrafo segundo, e no 105.3 para que o órgano de contratación formule alegacións en relación coa solicitude de medidas cautelares elevarase a sete días hábiles.

d) O prazo establecido no artigo 105.2 para a remisión do expediente polo órgano de contratación, acompañado do correspondente informe, elevarase a sete días hábiles.

e) Na resolución da cuestión de nulidade, o órgano competente para ditala deberá resolver tamén sobre a procedencia de aplicar as sancións alternativas se a entidade contratante o solicitou no informe que debe acompañar a remisión do expediente de contratación.

f) Cando a entidade contratante non o solicitase na forma establecida na letra anterior, poderá facelo no trámite de execución da resolución. En tal caso o órgano competente, logo de audiencia por un prazo de cinco días ás partes que compareceron no procedemento, resolverá sobre a procedencia ou non de aplicar a sanción alternativa solicitada dentro do cinco días seguintes ao do transcurso do prazo anterior. Contra esta resolución caberá interpor recurso nos mesmos termos previstos para as resolucións ditadas resolvendo sobre o fondo.»

Cinco. Suprímense os capítulos III e IV do título VII da Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais.

Seis. Modifícase o artigo 83.3 da lei, que queda redactado da seguinte forma:

« ...

3. Non se poderá proceder á formalización do contrato ata que transcorra o prazo de quince días hábiles a que se refire o número 2 do artigo 104».

Artigo terceiro. Modificación da Lei 29/1998, do 13 de xullo, reguladora da xurisdición contencioso-administrativa.

Un. A letra k) do número 1 do artigo 10 da Lei da xurisdición contencioso-administrativa pasa a ser a letra m) e engádense dúas novas letras k) e l) ao dito número 1 coa seguinte redacción:

«k) As resolucións ditadas polo órgano competente para a resolución de recursos en materia de contratación previsto no artigo 311 da Lei 30/2007, do 30 de outubro,

de contratos do sector público, en relación cos contratos incluídos no ámbito competencial das comunidades autónomas ou das corporacións locais.

l) As resolucións ditadas polos tribunais administrativos territoriais de recursos contractuais.»

Dous. Engádesse unha nova letra f) ao número 1 do artigo 11 da Lei da xurisdición contencioso-administrativa coa seguinte redacción:

«f) As resolucións ditadas polo Tribunal Administrativo Central de Recursos Contractuais, con excepción do disposto no artigo 10.1.k.)»

Tres. Engádesse un número 4 ao artigo 19 coa seguinte redacción:

«4. As administracións públicas e os particulares poderán interpor recurso contencioso-administrativo contra as decisións adoptadas polos órganos administrativos aos cales corresponde resolver os recursos especiais e as reclamacións en materia de contratación a que se refire a lexislación de contratos do sector público sen necesidade, no primeiro caso, de declaración de lesividade.»

Catro. Engádesse ao artigo 21 un novo número, o 3, polo que o actual 3 pasa a ser o 4, coa seguinte redacción:

«3. Nos recursos contra as decisións adoptadas polos órganos administrativos a que corresponde resolver os recursos especiais e as reclamacións en materia de contratación a que se refire a lexislación de contratos do sector público, os citados órganos non terán a consideración de parte demandada, séndoo as persoas ou administracións favorecidas polo acto obxecto do recurso, ou que se constitúan como parte en tal concepto, conforme o disposto no artigo 49».

Cinco. Engádesse un novo parágrafo ao número 1 do artigo 44, do seguinte teor:

«Cando a Administración contratante, o contratista ou terceiros pretendan impugnar as decisións adoptadas polos órganos administrativos aos cales lles corresponde resolver os recursos especiais e as reclamacións en materia de contratación a que se refire a lexislación de contratos do sector público, interporán o recurso directamente e sen necesidade de requirimento previo ou recurso administrativo.»

Seis. Engádesse un novo parágrafo ao número 1 do artigo 49, nos seguintes termos:

«Nos recursos contra as decisións adoptadas polos órganos administrativos aos cales lles corresponde resolver os recursos especiais e as reclamacións en materia de contratación a que se refire a lexislación de contratos do sector público serán emprazadas como parte demandada as persoas, distintas do recorrente, que tivesen comparecido no recurso administrativo, para que poidan constituírse como demandados no prazo de nove días.»

Disposición adicional primeira. *Réxime dos órganos competentes para resolver os recursos da Administración xeral do Estado e entidades contratantes adscritas a ela.*

1. A medida que o número de asuntos sometidos ao coñecemento e resolución do Tribunal Administrativo Central de Recursos Contractuais o exixa poderanse constituír tribunais administrativos territoriais de recursos contractuais con sede en cada unha das capitais de comunidade autónoma.

Estes tribunais terán competencia exclusiva para a resolución dos recursos a que se refire o artigo 310 da Lei 30/2007, do 30 de outubro, interpostos contra os actos da Administración territorial do Estado ou dos organismos e entidades dependentes del que teñan competencia en todo ou en parte do territorio da correspondente comunidade autónoma.

O nomeamento do presidente e dos vogais destes tribunais farase nos mesmos termos e requisitos previstos para o do Tribunal Administrativo Central de Recursos Contractuais, aínda que só se lles exixirán dez anos de antigüidade.

A atribución de competencia a estes tribunais territoriais para resolver as reclamacións previstas nos artigos 101 e seguintes da Lei 31/2007, do 30 de outubro, será obxecto de regulación por vía regulamentaria.

2. Regulamentariamente incrementarase o número de vogais que deban integrar os tribunais territoriais a medida que o requira o volume de asuntos sometidos ao seu coñecemento.

A primeira renovación dos tribunais farase de forma parcial ao tres anos do nomeamento. A este respecto, antes de se cumprir o prazo indicado determinaranse, mediante sorteo, os que deban cesar.

En calquera caso, cesado un vogal, este continuará no exercicio das súas funcións ata que tome posesión do seu cargo o que o deba substituír.

Disposición adicional segunda. *Apoio técnico e administrativo ao Tribunal Administrativo Central de Recursos Contractuais.*

Con obxecto de garantir a eficacia do procedemento de resolución dos recursos, a Secretaría da Xunta Consultiva de Contratación Administrativa prestará apoio técnico e administrativo ao Tribunal Administrativo Central de Recursos Contractuais. Para este fin, a citada secretaría será dotada do persoal técnico e administrativo necesario con coñecementos adecuados sobre a materia.

Regulamentariamente determinarase a forma en que se desenvolverá o apoio mencionado no parágrafo anterior, así como o modo en que serán asistidos técnica e administrativamente os tribunais territoriais que se creen.

Disposición adicional terceira. *Comunicacións e notificacións.*

1. As comunicacións entre os órganos competentes para a resolución dos recursos ou das reclamacións e os órganos de contratación ou as entidades contratantes faranse, sempre que sexa posible, por medios informáticos, electrónicos ou telemáticos.

2. As notificacións aos recorrentes e demais interesados intervenientes nos procedementos de recurso faranse polos medios establecidos na Lei 30/1992, do 26 de novembro. No entanto, cando o recorrente admitise as notificacións por medios informáticos, electrónicos ou telemáticos durante a tramitación do procedemento de adxudicación, no caso de ter intervido nel, e, en todo caso, cando o solicite no escrito de interposición do recurso, as notificacións efectuaránselle por estes medios.

Disposición transitoria primeira. *Primeiro nomeamento e constitución do Tribunal Administrativo Central de Recursos Contractuais.*

Mentres non se desenvolva regulamentariamente a composición do Tribunal Administrativo Central de Recursos Contractuais, este estará composto polo presidente e dous vogais, para cuxa provisión se publicará a correspondente convocatoria no «Boletín Oficial del Estado» dentro dos sete días seguintes ao da publicación desta lei.

Efectuados os nomeamentos, o tribunal constituirase nun prazo non superior a sete días, comezando a recibir e tramitar os recursos a partir da data da súa constitución, sempre que se cumprise o prazo previsto na disposición derradeira para a entrada en vigor desta lei.

O presidente e os dous vogais alternaranse na formulación dos relatorios para resolver os recursos.

Disposición transitoria segunda. *Réxime supletorio para as comunidades autónomas.*

Mentres unha comunidade autónoma non regule ante quen debe incoarse a cuestión de nulidade prevista nos artigos 37 a 39 da Lei 30/2007, do 30 de outubro, ou nos artigos 109 a 111 da Lei 31/2007, do 30 de outubro, ou interperse o recurso contra os actos

indicados no artigo 310.1 e 2 da primeira ou no artigo 101.1 da segunda, e que efectos derivarán da súa interposición, serán de aplicación as seguintes normas:

a) Serán impugnables os actos mencionados no artigo 310.2 da Lei 30/2007, do 30 outubro, tal como queda redactado por esta lei, cando se refiran a algún dos contratos que se enumeran no número 1 do mesmo artigo ou, de ser o caso, os mencionados no artigo 101.1 a) da Lei 31/2007, do 30 de outubro, así mesmo na redacción dada por esta lei.

b) A competencia para a resolución dos recursos continuará encomendada aos mesmos órganos que a tiveren atribuída con anterioridade.

c) Os recursos tramitaranse de conformidade co establecido nos artigos 312 a 318 da Lei 30/2007, do 30 outubro, ou, de ser o caso, nos artigos 103 a 108 da Lei 31/2007, do 30 de outubro, tal como quedan redactados por esta lei.

d) As resolucións ditadas nestes procedementos serán susceptibles de recurso contencioso-administrativo. Cando as resolucións non sexan totalmente estimatorias ou cando, séndoo, comparecesen no procedemento outros interesados distintos do recorrente, non serán executivas ata que sexan firmes ou, de teren sido impugnadas, mentres que o órgano xurisdiccional competente non decida acerca da súa suspensión.

Disposición transitoria terceira. *Procedementos en curso.*

1. Os procedementos de recurso iniciados ao abeiro do artigo 37 da Lei 30/2007, do 30 de outubro, ou os de reclamación que se iniciasen ao abeiro do artigo 101.1 a) da Lei 31/2007, do 30 de outubro, na redacción vixente con anterioridade á entrada en vigor desta lei seguirán tramitándose ata a súa resolución conforme aquel.

2. Nos expedientes de contratación iniciados antes da entrada en vigor desta lei poderanse interpor a cuestión de nulidade e o recurso previsto no artigo 310 da Lei de contratos do sector público e a reclamación regulada nos artigos 101 e seguintes da Lei 31/2007, do 30 de outubro, contra actos susceptibles de ser impugnados ou reclamados nesta vía, sempre que se ditasen con posterioridade á súa entrada en vigor.

Disposición derogatoria.

Quedan derogados os artigos 112 a 121, ambos inclusive, da Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais e todos os demais preceptos, calquera que sexa o seu rango, que se opoñan ao disposto nesta lei.

Disposición derradeira primeira. *Dedución por dobre imposición sobre dividendos de fonte interna no imposto sobre sociedades.*

Con efectos para os períodos impositivos iniciados a partir de 1 de xaneiro de 2011, modifícase o número 2 do artigo 30 do texto refundido da Lei do imposto sobre sociedades, aprobado polo Real decreto lexislativo 4/2004, do 5 de marzo, que queda redactado da seguinte forma:

«2. A dedución a que se refire o número anterior será do 100 por cento cando os dividendos ou participacións en beneficios procedan de entidades en que a porcentaxe de participación, directa ou indirecta, sexa igual ou superior ao cinco por cento, sempre que a dita porcentaxe se tivese de maneira ininterrompida durante o ano anterior ao día en que sexa exixible o beneficio que se distribúa ou, na súa falta, que se manteña durante o tempo que sexa necesario para completar un ano. A dedución tamén será do 100 por cento respecto da participación en beneficios procedentes de mutuas de seguros xerais, entidades de previsión social, sociedades de garantía recíproca e asociacións.

Esta dedución será tamén de aplicación nos casos en que se tivese a dita porcentaxe de participación pero, con todo, sen se ter transmitido a participación, se reducise a porcentaxe tida ata un mínimo do tres por cento como consecuencia de que a entidade participada realizase unha operación acollida ao réxime fiscal especial establecido no capítulo VIII do título VII desta lei. O anterior será aplicable aos dividendos distribuídos

dentro do prazo de tres anos desde a realización da operación mentres que no exercicio correspondente á distribución non se transmita totalmente a participación ou esta quede por baixo da porcentaxe mínima exixida do tres por cento.»

Disposición derradeira segunda. *Modificación da Lei 29/2006, do 26 de xullo, de garantías e uso racional dos medicamentos e produtos sanitarios.*

Modifícase o parágrafo primeiro do número 2 do artigo 93 da Lei 29/2006, do 26 de xullo, de garantías e uso racional dos medicamentos e produtos sanitarios, que queda redactado do seguinte modo:

«2. Enténdese por conxunto a totalidade das presentacións de medicamentos financiadas que teñan o mesmo principio activo e idéntica vía de administración, entre as cales existirá, polo menos, unha presentación de medicamento xenérico. As presentacións indicadas para tratamentos en pediatría constituirán conxuntos independentes. Poderanse crear conxuntos desde o momento en que transcorresen dez anos desde a data da autorización inicial de comercialización do medicamento de referencia en España, ou once no caso de ter sido autorizada unha nova indicación.»

Disposición derradeira terceira. *Entrada en vigor.*

Esta lei entrará en vigor ao mes da súa publicación no «Boletín Oficial del Estado», excepción feita do disposto na disposición transitoria primeira en canto ao primeiro nomeamento e constitución do Tribunal Administrativo Central de Recursos Contractuais, que entrará en vigor o día seguinte ao da súa publicación no «Boletín Oficial del Estado».

Por tanto,

Mando a todos os españois, particulares e autoridades, que cumbran e fagan cumprir esta lei.

Madrid, 5 de agosto de 2010

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO